

中華民國六十二年十二月影印版

近代中國史料叢刊

第九十九輯

精裝三十

定價：三



元

主編者：沈

雲龍

發行人：李

振華

出版者：文海出版社有限公司

臺北縣永和鎮中興街99巷8號

郵政劃撥戶第二七八四號
電話：九二二六五九號

印刷者：金氏印刷有限公司

臺北市長安東路二段66號

經銷者：全省各大書局

本公司經內政部核准登記證為內版台業字第〇八〇〇號

續碑傳集卷七十七

江陰繆荃孫纂錄

文學二

貴溪縣知縣陸君墓志銘

李兆洛

陸出古陸終氏漢晉閒爲吳中望唐宰相宣公至君凡三十二世明初有昭毅將軍都督同知世襲錦衣衛指揮使諱福者自淮安徙居常州君之十四世祖也曾祖廷煒祖載起並諸生

贈順昌縣知縣父廣霖乾隆己未進士官廣西恭城縣知縣署思恩府百色同知嫡母高繼母莊生母林君諱繼輅字祁孫一字修平恭城之暮子也九歲而孤林太宜人實能長而成之君儀幹秀削讀書夙成文彩四照音聲清如喉鶴吐辭雋婉常傾座人當代先達有人倫鑿者爭羅而禮焉不肯輕涉世事惟肆力於詩清温多風如其人也嘉慶庚申中江南鄉榜八試禮部仍黜丁丑大挑二等選合肥縣學訓導君少羸善病憚鞅掌而爲校官得士譽上游薦以才任治劇又修省志董成事以勞議敘授江西貴溪縣知縣到官三年治政清肅因疾乞休旣得請旅省城行一矣而竟不起予年二十始識君於君之第一時里中少

雋士皆集因而定交予每至郡必詣君同人皆集君所予之友皆君友也君綢繆婉孌篤切劇之誼每朋尊促坐清酒百盞歡笑間作已或觸所聞見微辭致規因極論得失欲剜心相示涕泗橫流不知者以爲酒狂也自予服官淮甸遂不復見比君赴合肥予適旋里得一再見而情緒非復昔時矣君盡室之官空其屋以賃某姓某不戒於火盡燔所居追憶昔所遊宴處如在目前念君歸來當何如措懷而竟與人俱渺也復可以致思乎哉君性至孝痛祿養不逮爲林太宜人請封典撰錄年譜求諸同人能文詞者爲序讚銘誄等若干篇都爲一集以傳於後曰貞珉錄嘗致予書欲有所爲予不能繼諸人後遲遲未成也今君亡矣愧負何可釋著之君誌成君志焉著崇百藥齋詩文集并札記五十餘卷學者多愛誦生乾隆三十七年壬辰十一月二十六日卒道光十四年甲午六月二十三日配錢宜人生子耀連蚤卒女三壻懌彙昌洪毅曾揚方訓皆友之子皆文而才筮室王姓子二曰光迨曰嘉遂光迨五齡嘉遂二齡耳方耀連之不祿也君以兄子耀適之子聰應爲嗣孫曾孫佑杞佑勤君歿耀適爲塋葬於陽湖豐西鄉橫塘之阡道光十五年乙未十月二十五日也耀適齒稍長於君恩則父子而相親若兄弟其

趣操亦略同庶幾廣受籍咸之亞方刻君遺書而傳之銘曰

行何矧矧世何恩恩通而非通窮而非窮君文則工

黃潛夫家傳

李兆洛

黃潛夫名汝成字庸玉太倉嘉定人其先居今寶山江東鎮忠節公族裔也後遷嘉定者四世潛德弗耀曾祖曰國楷嘗封股以療其親疾祖曰通理考曰鐘皆恢然長者鐘無子以母弟鉉之子為後即潛夫也鉉字子仁亦縣學附生議敘主簿銜有文行潛夫器局瓌偉而才識敏達善讀書自年十四五時已博涉能文逾冠為縣學廩膳生益有名嘉定氣節文學自南宋來亮碩鴻輿重於海內潛夫少承家業習聞鄉先生端緒綜貫浩博達於精邃又善為文章論議閱整敘事繁簡廉肉率中體要學不泥章句而務合體用自古昔禮樂德刑以及賦稅田畝職官選舉錢幣權量水利河渠漕運鹽鐵諸事參校理勢損益遷燼而折衷於顧氏日知錄條比義類及所以施設者居閒復以聲音訓詁名物度數之學纂述為春秋外傳疏補諸經正義名實益高尤為今宮保兩江總督安化陶公今江西巡撫江夏陳公所知重乃殫竭心力以體過肥瘠疾作弗治殞年止三十九悲夫黃氏世有穆行其祖考好施與凡邑

禮輒先出巨資佐振潛夫性益豪達輕財喜蓄古書畫碑刻鼎彝錢鑑而族姻交友鄉里婚喪急難凡求者無弗應幾耗其資之半余頗以不節過之然自少至壯衣服飲食無改於舊又粹以千金周人困終無悔心與德色比歿郡邑識與不識都悼惜而來哭者輒慟抑亦賢已始余聞潛夫名而材之而余友寶山毛君生甫數歎美其學行生甫不妄譽者後潛夫嘗詣余於暨陽書院留信宿聽其論識明瑋達理道益信生甫爲知人而決潛夫學可深造大成雖頗憂其弗壽而不虞其遽止斯也嗚呼人世利祿貴顯不過數十寒暑人之死生其閒者何限自古鴻材碩儒閒亦弗克永年奚足致憾矧潛夫有可自傳述於後世耶余獨惜其志業未竟子仁以年老遽喪賢子且辱厚余而僅一見已也潛夫前已入粟議敘通判銜後入貲爲縣學官選安徽泗州直隸州訓導以憂未赴所著書惟成日知錄集釋三十二卷刊誤二卷袖海樓文稿若干首子三宗魯宗文宗英余旣重其人又哀其志生甫書來乞爲傳乃次序行事使附於家乘後云

又黃潛夫傳

其仁

潛夫姓黃氏名汝成字庸玉潛夫其號余外祖母爲潛夫祖姑故亦爲

表兄弟年亞余十餘歲性情意嚮相視莫逆往來尤密潛夫家故饒祖若父咸以醇德爲善於鄉邑中有義舉輒勸議施舍潛夫秉承家訓能弭人之急至不憚稱貸爲之幾耗其產之半余嘗以聖人有父兄在之義規之弗恤也少溺苦於學又留心經濟於田賦職官選舉河漕鹽筴錢幣有關治亂得失之故一一攷證源流務得真是崑山顧亭林先生日知錄一書服膺最深綜顧氏同時暨後賢著撰廣爲搜擇融貫條繫成集釋三十二卷刊誤四卷又通厯算之學爲休甯戴氏歲實考同邑錢氏朔實考校補各一卷袖海樓文集六卷左氏國語自韋昭注後有宋庠校本無作疏者欲仿諸經正義條其微文奧旨附於三傳之後草創甫定迄未卒業嗟夫以潛夫之學之才使天假之年必焯然有所表見於時而僅止於是可慨也夫始議敘通判銜後以入貲由廩貢生得安徽泗州訓導未之任道光十七年二月十二日卒於家年三十有九

子宗魯宗文宗英

又黃潛夫墓志銘

毛嶽生

余友潛夫名汝成字庸玉世爲嘉定人黃忠節公族裔也其暴疾亡余哭視其殮又爲文以祭後又序傳其遺書潛夫爲人仁厚豪達狀貌瓌

偉善辯說戲謔樂任人艱鉅無親疏厚薄苟當其意告以緩急卒累出
千金不悔而內行則極誠謹無過差平居衣服率節儉其爲學自天文
輿地厯律訓詁以及水利河渠漕運賦稅鹽鐵錢幣莫不洞其奧曷參
諸世會詳其所以利病得失而爲文則又明博簡慎知要嗚呼學問人
材之衰其賢者務殫窮於名物度數弗尙氣節至於設施張弛激昂奮
發以求利濟卒惟綵覈補苴而已其明道術之原知變通壹出闕廓動
合體用者鮮矣余窮於世頗以冀望潛夫或顯達有所建白爲不負學
識適久困伏遽喪悲夫始余與潛夫尊親子仁善少時數往來其家潛
夫時年十三四熟習文史已博辯古昔賢奸治亂後更潛關深造余遠
游歸輒累月留其家益相從講說德業間或賦詩飲酒登陟笑語爲樂
余性隘文行豈無可議嘗面折其短潛夫則自少至壯羣居獨處無片
言不足余者聞余言善則幡然從意不合則必積日逾時論定乃止視
余困亨如己憂憤悅豫無弗同又數濟余急而誠敬率有餘於財其家
世居西谿上谿旁頗饒竹木欲買田築室佚余老雖弗果意誼篤矣昔
惠子死莊子曰自夫子之亡也吾無以爲質矣余自潛夫歿居恆悵偃
出入語默若失其宗形然後知莊子之言爲悲夫莊子達於死生存亡

竄然於萬物之表而其言之悲猶若此矧惠子之賢未必過莊子而潛夫學行論著則實有助余者也潛夫著書成者日知錄集釋刊誤古今歲朔實校補文錄凡四十四卷未成者春秋外傳正義若干卷少爲縣學廩膳生歲饑勸分議敘得通判銜後入貲爲縣學官選安徽泗州直隸州訓導以憂未赴娶秦氏生子三宗魯宗文宗英女三長字張修事潛夫歿於道光十七年二月十二日春秋三十九以二十年三月二十二日葬於寒號十二圖李圩初潛夫世父損之先生無子以潛夫爲後先生少與先府君同受業於錢少詹事將歿屬余志其窆余故弟畜潛夫而往爲之銘又潛夫亡時武進李先生兆洛已爲之傳世系皆具略次其生平趣舍遊從長言志余慟焉詞曰

垓埏爲隘兮附嘍是從博學無命兮溘仁以凶義爲其質兮德爲華奚

不逮兮隕厥躬數逢其嗇兮匪其窮安其藏兮歲竊而隆

吳嵩梁傳

江西通志

吳嵩梁字蘭雪東鄉人年十五卽以文字爲金谿楊護所知結忘年交未冠赴金陵應

南巡召試歸受詩法於鉛山蔣士銓得杜陵宗派出游吳越開詩名籍

起嘉慶庚申舉鄉試官內閣中書名振都下青浦王昶北平翁方綱無錫秦瀛蒙古法式善錢塘吳錫麒並相推重篇什流播及於海外朝鮮侍郎申緯推爲詩佛吏部判書金魯敬父子鑊梅花爲龜奉其像並嘗置所爲詩卷嘗於仲春日集其國勝流置酒高會遙爲嵩梁祝壽好事者繪圖張之琉球陪臣向邦正奏請入監肄業亦出嵩梁門下學成歸國奉使來朝者皆以得其詩句爲榮會

玉牒館議敘嵩梁出知貴州黔西州兩充鄉試同考官兄崑榕工文精篆隸女弟素雲善繪事崑榕子晁炆亦能詩一門皆以文字翰墨著稱

荆溪周君保緒傳

魏源

君諱濟字保緒一字介存荆溪人荆溪周氏皆晉孝侯周處之裔也君自祖父以上無達者及君生而敏悟絕人嘉慶十年舉於鄉明年成進士廷對縱言天下事字數逾格以三甲歸班銓選知縣改就淮安府學教授歲餘淮安府知府王穀丁祭至學宮禮畢將就殿門外升輿君力拒之穀不懌去君即日移病去是秋淮安府山陽縣知縣王伸漢冒振事發王穀大辟所屬吏及委員皆誣誤惟君先幾得免君少與同郡李君兆洛張君琦涇縣包君世臣以經世學相切劘兼習兵家言習擊刺

騎射至是益交江淮豪士互較其長盡通其術并詳訓練營陣之制時
海賊蔡牽出沒江浙寶山知縣田鈞延君往商海防因客寶山數載癸
酉春田君丁母憂而河南山東教匪叛田君鉅野人以母喪在家未葬
鄰曹縣賊境身率官累弗克歸日夜憂泣君慨然請代行約四川武舉
任子田同往七晝夜馳二千里至鉅野知田君家無恙乃往來曹濟閒
行視郡邑戰守之術途遇曹州賊數百人突至君與任子田下車各持
一鎗仆其前二人創其黨數十人眾悉遁去山東鹽運使劉清勦賊有
名與君語甚契欲留君幕下君以事平謝歸作山東新樂府數十章以
代詩史回至吳門則田君尙虧官帑四千餘兩檄追甚急君乃請以己
廬十餘間及田五十畝稟官代抵事始釋嘗過京口丹徒令屠君倬患
居民訟洲田莫得其實久不決君曰明日可具鞍馬夫役爲君行視之
晨起至洲先丈量一處計其步數乃令役前行凡若干步卽止馬至止
所又令一役前行自晨至日晡縱橫環遶皆如之凡八十餘里還至署
令束取所記用開方法各乘除之謂屠君曰此特以測遠法用之方田
耳諸幕友如言覆核之盡得其實遂申報定案其學有實用如是自山
左歸寓揚州兩江總督大學士孫公聞其名過揚州邀見舟中縱談兵

事曰君將才也承平無所試可姑試諸兩淮私梟乎君笑曰諾孫公令
淮北各營伍及州縣聽君號令時淮北梟徒千百爲羣器械精銳君則
招諸豪士數十輩兼募巡卒教以擊刺月餘皆可用偵擊其大隊於安
東屢敗禽之淮北斂迹然君遂謝事曰嵯務不治其本而徒緝私私不
可勝緝也淮南諸商爭延重君遂措貲數萬金託君辦嵯淮北君則以
其貲購妖姬養豪客劔士過酒樓酣歌恆舞裙屐雜沓閒填小樂府倚
聲度曲悲歌慷慨醉持丈八矛揮霍如飛滿堂風雨醒則磨墨數斗狂
草淋漓或放筆爲數丈山水雲垂海立見耆毛髮豎人皆莫測君何許
人嘗言願得十萬金當置義倉義學贍諸族姻並置書數萬卷招東南
士友之不得志者分治經史各盡所長不令旅食干謁廢學所志皆恢
闊難就一日翻然悔曰吾數年一念所誤乃至此盡散其貲謝其黨因
自號止安作五言詩自訟其兵農雜進負初心遂去揚州寓金陵之
春水園時道光八年也年四十七盡屏豪蕩技藝復理故業先成說文
字系四卷韻原四卷輯平日古今體詩二卷詞二卷雜文二卷最後乃
成晉略十冊則以寓平生經世之學借史事發揮之遐識渺慮非徒考
訂筆力過人深坐斗室前此豪士過門概謝不見前後如二人然食貧

日甚遂復就淮安府學教授適漕運總督周公天爵駐節淮安亦好講武相得權甚及擢兩湖總督強同往許爲盡刊所著書遂以七月三日卒武昌年五十有九周制府使人歸其喪葬於荆溪君無子嗣其兄弟子二人皆不能讀書晚年妾蘇氏有遺腹子云

魏源曰子晚晤君金陵淮安冲夷如也無復少壯時態然以君所稟受苟見諸用庶幾周孝侯盧忠烈之風卽使中年專力學問不耗於詭奇所就亦不當止是君歿次年海氛訌熾

朝廷詔求奇才之士欲如君者海內不可復得天之生材不易生之而得盡其用又十一二亦獨何哉

書周進士濟

徐士芬

余門人袁生翼佐余校士嶺南嘗述其師周進士事甚奇進士名濟江南宜興人年十八領甲子鄉薦次年聯捷以知縣用父兄以其性卞急懼僨事爲請改教職銓淮安教授促之到官然非其志也郡守王穀篋篋不飭濟揭諸大府獄不得直罷職歸主講婁東書院其教士善誘不倦士樂就之然非其志也時淮楚閒鹽梟橫甚有司治之無策濟詣制府孫相國獻計從其言畀以偵緝之任濟素善拳勇工擊刺梟不敢近

往往棄鹽而逃以所獲鹽隨地鬻之前後集金無算會所親守襄陽請以所積金召募農人開墾襄陽曠土若干頃守不聽而前所逃諸梟結聚楚北伺其出將殺之乃間道歸治宅廣陵甚壯麗珍物美人皆具居無何棄之去蓋亦非其志也尋又主講山左曹州與總戎飲於郡署總戎素以驍勇稱酒酣語多自負濟曰公勇甚盍試之總戎正技癢鼓氣作勢奮擊濟濟一揮應手而仆負傷憊甚慚且恚踉蹌而歸郡守惡其失師儒體辭之復歸維揚日以醇酒婦人自廢噫此豈其志歟袁生述其軀體偉岸手大如箕不類書生者嗚呼可以想濟之志矣

周止庵先生傳

沈銘石

先生姓周氏名濟字保緒號未齋晚號止庵荆溪之畫溪里人父仁多學有孝行夢顛僧驅虎入室而生先生故以濟名幼奇慧九歲能屬文稍長卓犖自命好讀史尤好觀古將帥兵略暇則兼習騎射擊刺藝絕精隱然負用世志年二十四魁鄉書明年成進士以對策言直置丙科出爲淮安教授慨然曰此天將以玉成吾才也益發憤求有用之學爲深博無涯浹於經史外凡韜鈴營陣圖法罔不指次鑿鑿無何引疾去歷之齊魯晉楚遇山川形勝關隘阻阨處必窮究其要領不徒作汗漫

游而更隱求當世豪傑士以相切劘於是交游之中稍稍知先生有偉
道不得返泣爲先生言先生惻然曰友母如吾母吾請代子行仲衡爲
具徒從先生曰道遠人眾滋累耳無庸單騎遂往道出曹州猝遇賊黨
數百先生鎗仆其前隊二人被創者又十餘人賊驚遁卒至鉅野視田
太君喪無恙而返并察近縣諸利害得聞爲當事言之於是方面重臣
亦有知先生非文弱士者濟南寄圃孫公持節兩江以淮南北鹽梟充
斥聘先生任緝私事令所在營弁得聽指揮先生以兵法部勒禽擊防
撫畢當一日與梟眾相持梟自後將發巨礮先生怒馬抽矢射之中其
巨指礮不得發乘勢擊之獲百十人會有尼於制府者事寢不行先生
遂去而知兵之名益震大江南北間後僑寓白門春水園與契友涇邑
包孝廉慎伯世臣砥礪實學互相警發也包深悉水利先生洞曉兵機
當是時數吳中士有裨世用者必首及兩人而先生一腔蘊蓄磅礴無
寄乃賅括蒼萃著爲晉略一書體例精深識議英特其諸論贊中於攻
取防守地勢必反覆曲折確有指歸俾覽者得所依據自言此書爲一
生精力所聚實亦一生志略所寓也不得施諸世因以託之言豈徒與

王隱臧榮緒輩較其得失短長已哉晚復秉鐸淮安磨礪英氣更慥慥
爲篤行儒教育之餘采地之孝貞節烈者盈千人牒諸大府旌其閭庠
樂久廢先生遴童子之秀者教以舞蹈搏擊丁酉釋奠觀禮者盈千人
十時稱爲盛事漕帥周文忠公梧村移督兩湖邀先生行先生猶冀有
所奮去官從之抵夏口遇疾卒年五十有九周公厚紀其喪并刊其所
撰晉略焉

論曰先生書宗六朝畫宗北宋他詩古文詞及韻原字系諸書合二百
萬餘言而傳弗詳載者恐掩其大也嗟乎天之生才不數生才矣使成
爲有用之才尤不數抱負如先生沈沒山林則已耳亦旣策名

天府見知於一二大臣卒不使爲國干城展盡生平底蘊而僅僅以柔
翰功名終亦獨何哉獨何哉

止安先生家傳

丁晏

先生姓周氏名濟字保緒又字介存號未齋晚號止安江蘇荆溪人君
之生也父夢顛僧驅虎入室及覺而君墜地遂以濟命名幼敏悟勇於
爲學九歲能屬文稍長深沈有智略膂力絕人讀書明大義不屑爲章
句之學年二十四嘉慶甲子舉鄉魁明年乙丑成進士以對策戇言抑

真兩科出爲淮安府教授因憮然曰吾今日始可讀書矣益自淬厲求
之六經三史以期實用深明鉛鈐練習營陣圖法暇則縱情詩酒放浪
於江淮間要其讀書清進未嘗一日輟學也未幾謝病去官乃出遊求
天下之士得涇包君世臣以實事相切劘屏去瑣碎提挈要領卓然爲
通儒有用之學聞與包君共學書肆力北朝碑帖窮日夜臨摹至髀病
不少劬闕其用筆換骨易筋嘗病大王姿媚唐主好之沿爲習尙而古
意寢微近世書惟鄧完白山人篆隸精妙陵轍古今書學絕而復續與
包君論書之祕曰峻曰澀曰中竇其書變化騰擲自成一家時人莫之
好也又與商邱宋君端已學作畫謂畫衰於文華而絕於憚王因求之
北宋大家得其骨法純用墨鈎使筆如鐵著折肱錄以見志僑居金陵
春水園樵真景八尺幅每自署曰春水翁作花卉必折供膽瓶置其向
背曲盡寫生之妙君之書畫初出當世頗不謂然迄今閱三十年長幘
短箋珍逾什襲競爲士大夫寶貴矣君任俠好施與數往來齊魯晉楚
結納豪士擊刺騎射互較所長君必精其技乃已君之友寶山令田君
家鉅野有母喪時豫省賊匪滋事剽掠曹滑田君以道阻不得歸憂形
於色君慨然曰我爲君一行挈一僕從七晝夜至鉅野時賊將平視田

太君喪得無恙田君復以虧帑失職君又鬻田產抵於有司田君始得釋其好義輕財急人之難多類此方君之之鉅野也道出曹州猝遇賊黨數百人君下車持鎗擊之仆其前隊二人其被重創走者又十數人賊驚竄遁去由是君之名益震濟南孫公爲兩江節相慕君才略延致之以淮南北鹽梟充斥撥緝捕費二萬金屬君獨任其事令各營副將以下惟君指麾左右之時梟黨數千人皆亡命無賴并力拒捕君偵知穴巢要擊殲除不遺餘力一日與梟眾相持梟自後將發巨礮君覺有異急回馬抽矢射之中其巨指礮不得發乘勢追擊之禽梟眾十百人君長於兵法不得一展其才捕戮私梟甚非所願以其拒傷官軍戕害民命持藉此小試以張朝廷之威然非君之志也會有以激變言於制府者事寢不行而君亦決計退休矣乙未秋復起病爲淮安校官垂老著書折節爲儒者行以讀書敦品教士子淮之人幽光潛德久而未彰者君牒於大府舉節烈貞孝千有餘人皆旌其閭文廟雅樂久涇營力爲振興遜童子之秀良者教以執籥秉翟舞蹈之節吹篪擊鐘搏拊之事凡數月而文物燦然丁酉春秋釋奠觀禮者逾千人君又節脩脯所入自輸錢二百緡存質庫權子母爲每歲興舞之用則復古之盛事也

漕帥東阿周公雅重君之為人周公擢兩湖總督君遂辭官從之行抵夏口嬰疾弗瘳以道光己亥年七月三日卒於行館年五十有九周公經紀其喪賻遺甚厚并刻其晉略以傳世君所著有說文字系二卷韻原七卷介存齋詩六卷味雋齋詞一卷史義二卷而最著者爲晉略云論曰君之爲晉略也一生精力畢萃於斯體例精深因而實荆非好學深思留心當世之務者烏能讀是書哉余讀其史論推見治亂若身履其間每覽一篇未嘗不欷歔流涕君少有命世之志旣不得意迺著書以自見雖述舊文直同作者以是爲周君之書云爾

太鶴山人傳

湯紀寄

太鶴山人者青田端木先生國瑚也青田故產鶴故山以鶴名山人生而清傲似鶴其大父芝巖取易中孚誼字之鶴田晚乃自稱太鶴山人云當

睿廟時文達阮公督浙學得山人恆誇示人曰此青田一鶴也戊午舉於鄉明年己未文達偕朱文正主禮闈亟思得山人卒被放厥後用大臣薦

召相吉地敘勞官中書加秩六品歲癸巳文達適入覲自滇留主會試

山人與其選用知縣投牒就原官

國朝監唐制置舍人司制誥票儼亞其選翰林雄材魁士百年相禪顧地閒冷遷轉迂多抑遏終山人性靜退有逸士風好讀易閱身幽墨不驚華顯初爲校官湖州樂之至是回直內閣益澹榮利願專志注易與昌樂閻學海平定李星蟠爲友二君者以進士同官同居狷而劬學又同每入直聞宮雅嘯雜聲視日下春借步出長安門覓蹇車共載以返荒廬黯黯與閻論詩與李論文山人則以易理縈拂之易指成假歸出都門載書半籠則易稿也送者慕之以爲幽人之貞焉沒祔湖州峴山蘇公祠山人著書易指外詩文若干卷其地理元文注痛悔少作晚欲削之子百祿拔貢生

又太鶴先生墓表

宗稷辰

太鶴先生者青田端木君也青田故有鶴而山以鶴名君生而神貌肖之其大父芝巖翁取易乾中孚兩九二之義字之曰鶴田而命其名曰國瑚晚乃自號太鶴山人海內外知者多稱太鶴先生云當

仁宗皇帝時真州阮文達公采風東南得君以誇示朝右曰吾得青田一鶴爲至幸由是名聞天下及戊午書升明年文達佐朱文正公主會

試甚望得吾卷乃竟下第人以此高之後三十餘年君已官於朝爲內閣舍人文達自滇黔持節朝京師遇於郊外與君酌酒朱文正墓道猶言疇昔聞中文正以不得鶴爲嫌是年癸巳三月文達將陞辭宣宗皇帝留之入會闈錄異才三數人君適在選世旣奇其遇時上知君深明易理汪文端曹文正曾交薦之其以

召相吉地官內閣加六品秩皆由

特恩至是時論當選擇乃因卷置三甲用縣令仍請回直閣中蕭然如未第益淡世味專力注易易指成俸未滿卽求去人以此愈高之君性清介不耐煩劇曾辭縣令至再爲歸安學教諭樂將終身焉自

召入直貧甚於教士時雖奏勞

山陵不以爲功深悔地理元文之注欲燬其板在京絕不與大家卜地居浙邸紫藤精舍閉門著書談易以外薄酌詠歌無他嗜閣中與山左閻星持山右李漪蘭及稷辰最親自君退而先沒李與閻相繼逝世余爲作內閣三先友傳以哀之君沒後湖州學子附位於峴山蘇公祠鄉士夫請祀於郡邑鄉賢祠爲吏所尼久之始得入奏章到上嗟念其人卽

俞允益

聖明知之深而恩尤獨優於身後也雖命之蹇數之奇而三才通六行
修身完其性之潔沒終不失其名之高非古所謂無求自得之君子乎
受於世者薄則合乎道者多其傳諸無窮奚疑也君齒與名德皆先余
余素尊禮之君亦與余相得甚既沒其子百祿來見就余問學余妻以
少女所以永舊誼也君所著書周易指四十五卷詩集十三卷已行世
文集四卷待刊生於乾隆三十八年三月初十日沒於道光十七年九
月二十二日是年十月從君遺命葬湖州之仁王山故交門弟子爲置
墓田歲時醑薦不絕君元配陳安人箴葉氏林氏子四長大雅次嘉議
早殤三百祿爲拔貢生能世君學幼百禮女子三歸士族君葬時無內
碑故詳及之咸豐三年其姻稷辰始爲表

晉卿董君傳

吳德旋

君名士錫字晉卿一字損甫武進縣副榜貢生候選直隸州州判先世
姓趙氏系出宋魏懿王德昭其始遷武進者曰元處士孟堙至明季有
名中允者出嗣於董爲姑之夫後更名承獻承獻之後皆姓董氏君大
父曰開泰廣東昌化縣知縣父曰達章國子監生以能詩名君幼從大

母錢孺人受孝經章句及就外傳讀諸經史悉能通解年十六從其兩舅氏張皋文宛鄰遊皋文以文學伏一世君承其指授爲古文賦詩詞皆精妙而所受虞仲翔易義尤精君家貧非客游無以爲養厯主張太守古餘阮尙書洪澤方太守茶山唐通守柘田洪觀察石農鄒觀察錫濬皆名公卿也又厯主講通州紫琅書院揚州廣陵書院泰州書院所至士皆慕而親之嘗客安徽爲六安晁梅生盧義山修其族譜時同里孫于丕知懷遠縣李申耆爲修縣志未成而以事去延君續修焉道光辛巳君房師霑化蘇君觀察淮揚招君於幕蘇君猝染時疫病甚君侍疾謹或告君鄉試期迫盍舍去君作色曰吾受吾師知遇之恩未能一日報今吾師疾病而吾遽舍之而行非特無以酬吾師且重負吾師也卒不應試留侍疾閱數月蘇君乃愈遷福建按察司旋丁父憂歸而南河總督黎襄勤公素知君才及是賢君之爲聘請修續行水金鑑行水金鑑作於雍正間傅澤洪厯考河道古今沿革興廢成敗之由爲河務薈萃之書而於黃淮運三河爲獨備歲久未輯君以爲前作詳於考古略於徵今續之者宜詳於徵今而略於考古如永定河之工程今增於古幾十倍矣而前書未詳尤宜備載因草例十數條以上襄勤公歎服

君輯是書三載書未成而襄勤公卒事中輟矣其後河督張公副河督潘公至仍延君纂修而卒成之君自中歲左肘生瘤治之罔效其後瘤敗而卒君好治陰陽五行家言殫心者數十載嘗曰世之言奇門六壬相墓者皆各自爲學吾獨求其原於易一以貫之然求之愈深聞者且駭恐世之卒莫子知也所著有齊物論齋集賦二卷文六卷家譜一卷詩八卷詞三卷外編三卷遁甲因是錄二卷未成者遁甲通變錄形氣正宗賦家譜詞已刻餘未刻藏於家

吳德旋曰予始識君時君年甫及冠所爲文已駸駸入古人之室其志豈以小成自甘哉而竟止於是徒令天下後世人惜奇才之不遇也吁足慨矣

澗齋顧君墓志銘

李兆洛

鄭漁仲輯藝文略始附以校讐之名然其所言校讐之事惟編纂類例搜求亡書不啻灌漑則尙是目錄家也無與校讐事劉向別傳曰校讐者一人持本一人讀詞若怨家相對故曰讐向於奉詔校理者必補其缺脫正其訛謬而條上之如以見爲典以陶爲陰甚者閏月爲門五日已亥爲三豕之類以後相承如顧容向朗鄭默褚元暈顏師古皆其選

也然皆校正其字形而已繼乃有校者荒陋不知守闕如之戒妄緣疑而致誤至剗肉而成瘡至有謬稱皇考妄易銀根者本初無誤校乃至誤此自書有刊本輕加雌黃儻經三刻而古人之真書失矣此亭林先生羅列改書之弊以爲後戒者也自爾諸儒如惠氏半農戴氏東原從而張之故

本朝讀書士共守此訓不敢妄改而讐校之事確然有所守故所刊書籍賢於前代遠甚乾隆中極盛矣上自鉅卿名儒下逮博士學究無不通知此義一時如抱經盧學士懷祖王觀察父子竹汀錢詹事無不兼擅其長而元和顧君澗蒼尤魁傑者也君名廣圻字千里號澗蒼陳黃門侍郎野王之三十五世孫曾祖沛祖松父文燧俱業醫世爲吳人少孤多病枕上未嘗廢書人咸異之年十二隨舅氏鄭源濤侍御於京師弱冠南回從張白華先生遊館於程氏程富於藏書君徧覽之學者稱萬卷書生焉不事科舉業年三十始補博士弟子員縣府試皆冠其曹繼從江良亭先生遊得惠氏遺學因盡通經學小學之義嘗論經學云漢人治經最重師法古文今文其說各異混而一之則膠轕不勝矣論小學云說文一書不過爲六書發凡原非字義盡於此欲取漢人經注

作段借長編而未屬稿君從兄之遺字抱冲亦邃於學而多藏宋本元
本書君一一訂正之列女傳以傳當是時孫淵如觀察張古愚太守
黃蕘圃孝廉胡果泉中丞秦敦夫太史吳山尊侍讀皆深於校讐之學
無不推重君延之刻書爲孫刻宋本說文古文苑唐律疏義爲黃刻國
語國策爲張刻撫州本禮記嚴州本單疏本儀禮爲胡刻文選元本通
鑑爲秦刻鹽鐵論揚子法言駱賓王集呂衡州集爲吳刻晏子韓非子
每一書刻竟綜其所正定者爲考異或爲校勘記於後學者讀之益欽
嚮爲漢學者往往不平宋儒而嘗警之君獨服膺焉徧讀先儒語錄摘
其切近者爲遯翁苦口一卷以教學者胸中博綜而能識之無遺每論
議滔滔不竭而是非所在持之甚力無所瞻徇家故貧常爲人校刻博
精以食雖往來皆名公卿未嘗有以自潤晚得類中症臥牀第者五年
道光十九年二月十九日卒年七十兆洛以道光二年客授揚州君時
館洪賓華殿撰家爲汪孟慈校刻其尊人廣陵通典所居相近故得朝
夕握手焉向聞君與金門學使懋堂大令以言語牴牾竊疑其盛氣難
近及見之進退粥粥詞色嫵煦知君徒以慈愿自守而狹中護前者不
能無所忤也君嘗從容論古書舛訛處細若毛髮夢如亂絲一經剖析

豁然心開而目明歎君慧業一時無匹惜未及隨時鈔錄取爲學者導
師嗚呼今則往矣配韓氏卒於道光十五年八月十九日年七十子鎬
孫瑞清從余遊將以某年月日葬於一雲山祖塋之旁瑞清請爲之銘
君所著多零星瑞清能守護之者予最愛君汪氏藏書目錄序及思適
寓齋記以爲可以見君之志故著之序曰汪君閩原藏書甚富取宋本
元本別編其目各成一冊以予於此向嘗究心屬爲序夫宋元本之可
貴前人所論綦詳收藏之家罔不知寶汪君宿具神解凡於有板以來
官私刊刻支流派別心開目瞭遇則能名而又嗜好專壹兼收並蓄既
精旣博希有大觀海內好古敏求之士未能或之先也朋嘗思之天水
蒙古兩朝自祕閣興文以暨家塾坊場儒學書院雕鏤印造四部咸備
往往可考固無書無地無人而非宋元本也其距今日遠者八百餘年
近者五百年而天壤閒乃已萬不存一雖常熟之錢毛泰與之季崑山
之徐著於錄者亦十不存二三然則物無不遷後乎今日之年何窮而
其爲宋元本者竟將同三代竹簡六朝油素名可得而聞形不可得而
見豈非必然之數哉然則爲宋元本計者當奈何曰舉斷不可少之書
覆而墨之勿失其真是縮今日爲宋元也是緩千百年爲今日也幸其

開更生同志焉而所爲宋元本者或得以相尋而無窮計無過於此者矣汪君之於宋元本知之深愛之篤其欲爲之計者當必有度越尋常之見故詳述斯語用爲序而論焉記曰以思適名齋者何顧子有取於邢子才之語也史稱子才不甚校讐顧子役役校書而取之者何顧子之於書以不校校之也子才誠僅曰不校乎哉則烏由思其誤又烏由而有所適也故子才之校乃其思也不校之誤使人思誤於校者使人不能思去誤於校而存不校之誤於是日思之遂以與天下後世樂思者共思之此不校校之者之所以有取於子才也顧子貧齋非所能闢也卽身之所寓而思寓焉而思適之名亦寓焉當其坐齋中陳書積几居停氏之所藏同志之所借以及敝篋之所有參互鉤稽以致其思思其孰爲不校之誤孰爲誤於校也思而不得困於心衡於慮皇皇然如索其所失而杳乎無覩人恆笑其不自適而非不適也乃所以求其適也思而得之豁然如啟幽室而日月之舉世之適誠莫有適於此也自反其思不知於子才何若也使誠善思之至則顧子每日天下有誤書而後天下無誤書雖論似矯要不病其過也爲之圖而記之且求先生長者及諸交遊題詠焉以爲此亦天下後世樂思者之所願聞也圖之

者誰某也所圖者今寓某也時則某年也寓齋中人顧子名廣圻字千里號澗齋也銘曰

先生之學惟無自欺以誠而明不爲書欺惟無自欺亦無書欺存其真面以傳來茲不爲書欺書無能欺屏絕附會定其然疑書以益人通知古今蠶之梨棗以無沈淪人以益書古與古居非今斯今亦無模糊惟其不欺是以不苟安得古書盡經君手凡立言者藉君不朽書有朽時先生不朽

吳仲倫先生墓志銘

并序

姚椿

宜興有獨行篤學之君子曰吳君德旋字仲倫當乾隆季年已以文學服海內迨後數十年而其志不衰抑或有訾其文與學者而卒不敢議其行豈非其志之立有以植其行與學於克久者歟君世居宜興北渠里口世祖中行明世以直諫張居正奪情事名在天下君幼時見袁枚所論先世事卽作文駁之踰冠以縣學生游京師與同郡張憲言友及四方諸聞人相切劘游四年歸用客授以養給自嘉慶九年以祿不逮養遂棄科舉業專志於學而游道日以廣年幾四十請益於桐城姚先生鼐先生以爲善學韓文君由是一意宗桐城學當是時言考據者徧

海內文字又皆以凌厲爲高君涵濡醞含斟酌損益欲使軌格不戾乎古以力與俗抗氣孤勢單眾譁且笑旣而翕然無閒言君以孤童支衰緒凡義所應爲者俱不敢後自少時已肩分輯宜興東臯草堂之支祠爲學宗宋儒而絕不欲以講學名友人或謂其以古六藝之旨導後進輒遜謝不敢當以爲僅能知古今人文章所自爲之意而已至自爲則輒不逮所能知十之六七又言人但當以畸士自我率吾性所近謂可希淵明萬一昔陸子靜謂淵明李杜皆有志於求道故以吾爲求道之士則不敢固辭若謂道積於躬而足以供人之求則斯世自有其人而德旋固去之甚遠也識者以爲知言君卒於道光二十年九月年七十四子二長謹縣學生次盈嘉君從游王國棟以謹狀來請銘予初聞君於宋先生大樽旣而識君於莊舍人仲方所會呂郡丞璜問古文義法於予予將遠行乃以君對其後璜與君游甚歡迨葬也璜已先卒予乃爲銘君著書甚具交游甚廣而予皆不載以爲是不足以銘君也銘曰晚周而降文與道分至本朝方氏乃始欲合其統緒而論者猶復紛紜君生於今勢如救焚不顧其力之不及顧欲企仰乎皇墳嗚呼仲倫生今之世而以古人自處

庶幾乎絕倫而超羣後之來者或且勉述此意而以絲絲延延乎無垠
我豈能言夙者知君後有傑士興起斯文

毛生甫墓志銘

姚椿

嗚呼生甫既沒之後四年予乃能執筆而銘其墓君毛氏名嶽生字生甫先世居太倉之寶山既而遷諸嘉定君名字在天下其先世次系詳見所自爲文及他人所著君少卽劬學每務博覽既而講於當世賢碩乃益篤志道古祖大瀛夙以文詞名父際盛從同里錢詹事受訓誥小學君皆不及授崛起自奮鬱然爲世聞人家境屯困屢出游以資兩世之養生甫所爲詩凌厲側出獨蹈險境卒能返於大道文則根本經術澤以義法不欲因襲陳軌嗚呼豈非古所謂豪傑特起之士者與君以前輩嘗病元史冗漏見詹事所爲殘稿因加補輯纂錄異冊數十種未已奔走道路年又限之卒未克底於成此古窮悴有志之士所爲撫躬而自悼者也君自處艱厄能以力所及者救人於經書不甚洽熟每出所見輒超然俗解之外外貌疏略而內實沈細武進李大令兆洛以爲三反李蓋實與君爲深知者君先世於子家有交其問業於惜抱先生之門也椿實介之以往後又最爲兩淮都轉運使瑩所知故每自云生

平於姚氏爲厚昔屢戲言各以身後相屬予衰病無文故當累君執筆而不幸反是此予所以臨紙屢悲而不能終竟也君既有成言又君舅氏朱君鳳南以書來請乃不果辭君娶陳氏子三次元之尤穎悟蚤殤存者曰企之孫一端君卒以道光二十一年九月十日年五十一冬葬於嘉定裳字圩彭門祖塋其葬也實賴友朋之力銘曰
嗚呼生甫學胡篤才胡異少尠鄉曲之譽而長阨其四方之志孤衷激致畢世顛頓惟其著述皓首文字此則生平微尙所託庶幾可徵諸來禩也噫

誼卿湯君傳

吳德旋

湯君名洽名字誼卿世爲武進人少穎慧善讀書及長以入貲爲州同知應順天鄉試學於張編修惠言以能文名兼通天官秣數星祿之說嘗以祿學考取天文生補未及期而歸一以修業著書爲事已而游楚復游豫或踰年歸或未踰年卽歸意忽忽如有所不樂云君與其內弟莊績澍最相善績澍亦好爲秣祿之學然自以不君若也每有所得必就正於君君嘗與績澍分撰五經祿術補及疏證書未成而卒年四十有一君所著有穀梁春秋例一卷句股祿指一卷太初術長編二卷漢

書分野星度斟誤一卷梁書藝文志一卷又補陳書藝文志一卷山海經道里考一卷北魏張淵觀象賦補注一卷賦稿一卷雜文稿一卷詩稿六卷藏於家

吳德旋曰吾郡多好學深思之士蓋有名不出里巷而著述足傳於後者矣夫學期自得邊暇計及於人之知不知耶迹君游歷所至未嘗與人競一日之名故卒所成就如此然竟不獲一展其蘊也惜哉

二侯傳

陳澄

侯君模名廷楷更名康君模其字也其先江南無錫人祖金鉉遷廣東爲番禺人君模幼孤好學喜讀史家貧無書母張爲稱貸得錢買十七史讀之久卷帙皆敝愛南北朝諸史所載文章爲文輒效其體阮文達公總督兩廣開學海棠課士賞其文由是知名後乃研精注疏盡通諸經而史學尤深正史之外旁搜羣籍倣裴松之注三國志例注隋以前諸史嘗曰

國初以梅氏算書顧氏讀史方輿紀要李氏南北史合鈔稱天地人三奇書論者謂李書未可鼎足吾書成其將取而代乎又曰注史與修史異注古史與注近史又異史例貴嚴史注宜博注近史者羣書大備注

古史者遺籍罕存當日爲唾棄之餘今日皆見聞之助宜過而存之爲後漢書補注續一卷三國志補注一卷後漢稱續者以有惠定宇補注三國志杭大宗補注未完善故不稱續焉又以隋以前古書多亡著書者湮沒不彰補撰後漢三國晉宋齊梁陳魏北齊周十書藝文志而自注之後漢三國成經史子三部餘未成尤好左氏傳謂近儒多尊賈服而排杜解然杜固有勝賈服者儒者說經當求心之所安毋徒博好古之名欲著書以持其平亦未成又治穀梁傳考其涉於禮者爲穀梁禮證其餘羣經小學皆有論說多前儒所未及又考漢魏六朝禮儀貫串三禮著書數十篇爲人孝友惇篤性兼狂狷質直疏易喜飲酒招呼朋好諧謔閑作不治家人生產至不識算子惟以授徒自給體氣羸弱不離藥物而讀書恆至深夜亦頗以此致疾云以優貢生中道光乙未科舉人會試歸發病逾年卒年四十四弟度同年舉人時稱爲兩經師子琴名廷椿更名度少貧困傭書於外夜歸置鐙小几上踞坐讀書兒女雞犬環繞之不厭也年三十七始爲縣學生員與君模同年申舉人道光二十四年大挑一等試用知縣分發廣西署河池州知州州縣官到任饋金於上官曰到任禮時節饋金曰節禮子琴以貧故獨不饋知